



9. marts 2012

FM 2012/67

Inatsisartut Suleriaasianni § 33 naapertorlugu aalajangiiffigisassatut siunnersuut imaattoq matumuuna saqqummiuppara:

**Maannakkut suliffimmut atatillugu inigisap ukiut arfineq-marluk najugarereerlugu tigusinnaanera allanngortillugu suliffimminut atatillugu ineqartup inimini ukiuni pingasuni najugaqareersimasup, inigisani nalininnaasumik attortittakkatut tigusisinnaanngornissaanut UKA 2012-mi ininik attartorneq pillugu Inatsisartut Peqqussutaata nr. 2-p 12. Maj 2005 – meersup allanngortinneqarnissaa pillugu siunnersuummik allannguutissamik saqqummiussinissamut Naalakkersuisut peqquneqarnissaannik Inatsisartut aalajangiiffigisassaattut siunnersuut**

(Inatsisartunut ilaasortaq Andreas Uldum, Demokraatit)

### **Tungavilersuut**

Ukiut kingulliit ingerlanerini kalaallit nunanni illut oqaluuserineqarluarnikooqaat. Sualummik ukiut kingulliit ingerlanerani sukkasuumik nalininnaasumik attartortittakkanik inissialiortitertoqarpoq. Taamaakkaluatorli suli inissaaleqineq annertuvoq sualummik illoqarfinni annerni.

Aamma ukiorpassuarni nalininnaanikuuvoq, Kalaallit Nunaanni atorfinikkaanni sullivimmut atsumik inimik tunineqartarneq. Soorunami taamatut periarfissaqarnera amerlasuunut nuannaarutissaavoq. Aamma taamatut periarfissaqarnera isumaqartitsilersarpoq nammineq illussarsiornissaq pisariaqanngitsoq, pisortat tamatumunnga ikiuutillarumaarmata. Suliffinnut atatillugu inissiat aamma akornguteqarput, nalininnaavormi amerlasuut atorfimminnik immaqa nuannarivallaanngisaminnik tigungminniinnartarnerat, initaqarnerinnaat pissutigalugu. Sulisoqartariaqarpugut tuniusimasunik taamaattumik aamma illuat sakkugalugu qilersorsimassanngilagut. Taamatut suliffimmut atatillugu inissaqartinneqartarneq nunasiaataanerup kinnganerisa ilagaat, piffissanngorporlu atorunnaarsinnissaat.

Demokraatit piffissami sivisuumi kissaatiginikuuat sapinggisamik amerlanerpaat namminneq initaartarnissaat. Taamaattumik aamma siuttuuffiginikuuarput illusaqarnerup namminersortunngorsarneqarnissaa. Naluneqanngilaq innuttaasut paarsilluarnerusartut, namminneq akisussaaffik tigungmigunikku. Taamaattumik siunnersuut manna aamma iluaqusiisussaavoq aallaqqaasiutigalugu suliffimmut atatillugu inigisamut nalininnaasumik attartortunngornissamut kingusinerusukkut pisiarisinnaanngorlugu.

2006-mi Inatsisartut peqqussutaat nr. 2,12. maj 2005-meersaq allanngortinneqarpoq, taamaasiluni pisariaarullugu suliffimmut atatillugu inigisap tigungiaraanni nalininnaasumik attartortittakkamik initaarniarluni allatseqqaarsimanissaq. Paasinarsisimavoq piumasaqaat akorngutaasut sulinut suliffimmut atatillugu inigisaminnik nalininnaasumik attartulerusuttunut. Soorunami ajunngitsup tungaanut alloriarneruvoq aammalumi 2006-miilli amerlasuut aaqqissuussineq tamanna

atorpaat. Uangullu isumaqaraluartugut amerlasuunut pitsaasuusooq suliffimmut atatillugu inigisaq ukiut arfineq-marluk najoreersimagaanni tiguneqarsinnaasoq, Demokraatini isumaqarpugut ukiut arfineq-marluk sivisuallaartoq.

Matumanga siunnersuuteqarnitsigut taamaattumik kissaatigaarput suliffimmut atatillugu inigisami ukiuni arfineq-marlunni najugaqareersimanissamut piumasaqaatip sivikillineqarnissaa ukiut pingasunngortillugit. Siunnersuutip aqputissiuutissavai sualummik Nuummi sulisut paarlagaallu arfianni sukkanerusumik suliffimmut atatillugu initaartoqartalernissaa, inissaarunnissamik anilaanngateqarneq pissutiginnarlugu atorfiinnut qilersorsimajunnaarlugit.

### **Pisortanut aningaasatigut allaffissornikkullu kingunissai**

Nalilerneqarpoq, siunnersuut pisortat aningaasaqarnerannut kinguneqarumaartoq inatsisip allanngortinnissaa suliarineqartussaammat, nutserneqartussaammat il.il. Kingornalu tusarniutigineqarluni. Inatsisissamut siunnersuutip suliarinera taamaasilluni allaffissornikkut suliakkersuutaasaaq. Naatsorsuutigineqarporli, Ineqarnermut, Attaveqarnermut Angallanermullu Pisorta qarfimi inatsisip allannguutissanik sananeq aningaasaliissutaareersut iluanni suliarineqarsinnaasoq imaluunniit suliat allat kinguartikkallarnerisigut.

### **Namminersorlutik Inuutissarsiortunut aningaasatigut allaffissornikkullu kingunissai**

Nalilerneqarpoq siunnersuut namminersorlutik inuutissarsiortunut aningaasatigut allaffissornikkullu kinguneqarnavianngitsoq.

### **Innuttaasunut aningaasatigut allaffissornikkullu kingunissai**

Nalilerneqarpoq siunnersuut innuttaasunut taamaallaat pitsaasumik kinguneqarumaartoq, sulisut sukkanerusumik suliffimminnut atatillugu inigisaminnik namminneq attartortunngortussaammat.

Taamatut oqaaseqarlunga qilanaarpunga Naalakkersuisut akissutaata tusarnissaanut kiisalu partiit allat saqqummiussassaannut.